

IDEAS PARA UNHA HOMILÍA CON NENOS 13 OUTUBRO 2024

Perdelo **TODO** por ter de todo

1. VER: Querelo todo

- Cando somos pequenos non paramos de gritar “meu, meu”, queremos apropiarnos de todo o que imos descubrindo ao noso redor. Pero aos poucos no cole e na catequese imos aprendendo a prestar as nosas cousas, a participar xuntos nos xogos. Porque hai pequenas renuncias que nos fan felices ao compartir o noso coa familia ou os amigos.

*Queres telo todo?
Cando estás máis contento?*

2. XULGAR: Perdelo todo por ter de todo

- No evanxeo de hoxe, un mozo bo achégase a Xesús e pregúntalle: *“que farei para herdar a vida eterna e ser feliz?”*. Xesús, véndoo tan apegado ao diñeiro, ás riquezas, dille: *“Unha cousa che falta: vende o que tes, dá o diñeiro aos pobres e logo sígueme”*. E o autor do Libro da Sabedoría fálanos de que pediu a sabedoría: *“preferina a cetros e tronos e ao seu lado en nada tiven a riqueza... Con ela viñéronme todos os bens xuntos”*.

QUE NOS QUERE DICIR?

- O mozo rico pasou os últimos anos traballando por conseguir o soño da súa vida: ter moito diñeiro para vivir con todos os caprichos, sen privacións e así ser feliz... Sabe que *“poderoso cabaleiro é don diñeiro”*, dise: *“es pobre e es rico, que máis queres Federico”*. Pero, con toda a súa riqueza, téndoo todo, non é feliz.
- Xesús faille unha proposta sabia: para ser feliz **fáltache** compartir a túa riqueza cos pobres, así terás un tesouro no ceo, logo sígueme. Xesús ensínalle a verdadeira sabedoría: as cousas non dan a felicidade, poden axudar; a felicidade non está en ter de todo senón ter no corazón ao que é o Todo, o que enche a túa vida, o que relativiza todo o demais.

Que experiencias de compartir tes?

Que che ensina Xesús?

3. ACTUAR: O que ten a Xesús o ten todo.

- Dialogamos: por que se marcharía o mozo e por que se foi triste.
- Vemos que cousas nos escravizan, átannos, non nos deixan ser máis felices.
- Dicímoslle a Xesús: Xesús, quero seguirte; ir deixando cousas, amar máis, terte a ti. Ti, Xesús, es o meu tesouro valioso. Téndote a ti, téño todo: serei feliz e terei un tesouro no ceo.

Que vou facer?

E no grupo?

LECTURAS

SABEDORÍA 7,7-11: *Ao lado da sabedoría en nada tiven a riqueza.*

Supliquei e foime dada a prudencia, invoquei e veu a min **o espírito de sabedoría. Preferina a cetros e tronos** e ao seu lado en nada tiven a riqueza.

Non a equiparei á pedra máis preciosa, porque todo o ouro ante ela é un pouco de area e xunto a ela a prata é como o barro.

Quíxena máis que á saúde e á beleza e preferina á mesma luz, porque o seu resplandor non ten ocaso.

Con ela viñéronme todos os bens xuntos, ten nas súas mans riquezas incontables.

Palabra do Señor.

SALMO 89 R/. Sácianos da túa misericordia, Señor, e estaremos alegres.

HEBREOS 4,12-13: *A palabra de Deus xulga os desexos e intencións do corazón.*

MARCOS 10, 17-27 (forma breve): Vende o que tes e sígueme.

Narrador: Naquel tempo, cando saía Xesús ao camiño, achegóuselle un correndo, axeonllouse diante del e preguntoulle:

Mozo rico: -«*Mestre bo, que farei para herdar a vida eterna?*».

Narrador: Xesús contestoulle:

Xesús: -«*Por que me chamas bo? Non hai ninguén bo máis que Deus. Xa sabes os mandamentos: non matarás, non cometerás adulterio, non roubarás, non darás falso testemuño, non estafarás, honra a teu pai e a túa nai*».

Narrador: El replicoulle:

Mozo rico: -«*Mestre, todo iso cumprino desde a miña mocidade*».

Narrador: Xesús quedou mirándoo con agarimo e díxolle:

Xesús: -«*Unha cousa che falta: anda, vende o que tes, dálo aos pobres, así terás un tesouro no ceo, e logo ven e sígueme*».

Narrador: A estas palabras, el engurrou o cello e marchouse triste porque era moi rico. Xesús, mirando ao redor, díxolles aos seus discípulos:

Xesús: -«*Que difícil lles será entrar no reino de Dios aos que teñen riquezas!*».

Narrador: Os discípulos quedaron sorprendidos destas palabras. Pero Xesús engadiu:

Xesús: - «*Filios, que difícil é entrar no reino de Deus! **Máis fácil lle é a un camelo** pasar polo ollo dunha agulla, que a un rico entrar no reino de Deus*».

Narrador: Eles espantáronse e comentaban:

Apóstolos: -«*Entón, quen pode salvarse?*».

Narrador: Xesús quedou mirándoos e díxolles:

Xesús: -«*É imposible para os homes, non para Deus. Deus pódeo todo*».

Palabra do Señor.

(Narrador- Mozo rico – Xesús -Apóstolos)